

Powšitkowne WOZJEWJENJA

njedźelu, 27. měrca 2016

Časowy přehlad křižerskich procesionow

Dokładny přehlad časow wšitkich křižerskich procesionow kaž tež čara, po kotrejž na tampuću a dompuću jěchaja, je na internetowej stronje www.posol.de a tam pod „Časy křižerskich procesionow“ podaty. Přehlad je w serbskej a němskej rěči zestajany.

Zhromadny dzeń za 1. a 2. lětnik

Pod hesłom „Jězus z mrtwych stanył je, haleluja!“ přeprašuje dekanatne dušepastyrswó džěci 1. a 2. lětnika pjatk, 1. apryla, wot 9 do 15 hodź. do Don Boskoweho domu we Worklecach. Zajimcy njech so prošu hač do wutory, 29. měrca, pod telefonowym čisłom (03 57 96) 8 87 07 we Worklecach přizjewja. Za wudawki dnja zběra so wot kóždeho wobdźelnika přinošk, kotryž wučinja štyri eura.

Jutrowne překwapjenki w klósterskej zahrodze

Jutrownu srjedu, 30. měrca, su dorosćeni a džěci do klósterskeje zahrody w Pančicach-Kukowje na dyrdomdejske popołdno přeprašeni. Wot 13 do 17 hodź. móža na přikład wowčerja z jutrownymi jehnjatami dožiwić, nalětnje spěwy z džěcacych chórom Drježdžansko-Mišnjanskeho biskopstwa spěwać, kreatiwni być abo wot rjadnicow zhonić, što je w klóstrje noweho.

Nyšpor z požohnowanjom motorskich

Popołdno z požohnowanjom motorskich zahaji so njedźelu, 10. apryla, w 14 hodź. z nyšporom w Ralbičanskej cyrkwi. Přizamknje so wulět.

Bratrowstwo hraje w Radworju

Přichodne předstajenje džiwadłoweje hry „Hdyž kokula woła“ budže njedźelu, 10. apryla, w 16 hodź. na žurli Radworskeho hosćenca „Meja“. Džiwadłowa skupina Bratrowstwa wšitkich wutrobnje přeprašuje.

Přeprašenje na Maćičnu akademiju

Na temu „Stawizny a stawiznički ze Serbskeho seminara w Praze“ přednošuje dr. Birgit Mitzscherlich, nawodnica archiwa, biblioteki a pokładownje Budyskeho tachantstwa, štwórtk, 7. apryla, w 19.30 hodź. w Budyskim hosćencu „Wjelbik“, Žitna 7. Přednošk budže w němskej rěči, zastup je darmotny. Stawizniska sekcija Maćicy Serbskeje wšitkich zajimcow wutrobnje přeprašuje.

Putniska jězba do Španiskeje a Portugalskeje

Wšitcy zajimcy su wutrobnje na putnisku jězbu z busom do Španiskeje a Portugalskeje přeprašeni, kotraž budže wot soboty do njedzele, 9. do 17. julija. Wopytaja Barcelonu z katedralu Sagrada Familia, španisku stolicu Madrid, Avilu a Albu – městnje skutkowanja swjateje Terezy z Avile – a znatej putniskej městnje Fatimu a Santiago de Compostela. Přizjewjenja su móžne pola Šmitec w Radworju, telefonowe čisło (03 59 35) 28 60 abo z mailku na adresu: email@schmidt-reisen-radibor.de.

Družki na zjězd katolikow

Na zakónčacej Božej mši 100. zjězda katolikow Němskeje, kotraž budže njedźelu, 29. meje, dopođnja na Augustusowym naměsće w Lipsku, su holcy prošene, zo bychu jako družki sobu začahnyli. Wone změja w přednim dźělu swoje městna. To wobkrući Christina Vogl, sobudželaćerka w zarjedže zjězda za liturgiski wobłuk. Wona doda, zo je tež planowane, zo so jedna próstwa w serbskej rěči přednjese.

Družki wot 9. lětnika su prošene, zo bychu so na tutech kemšach k wjetšej česći Božej wobdžělili. Jězbu z busom do Lipska njetrjebaja wone zapłaćić. Wotjězd budže něhdže w 6.30 hodź. Wone měli hižo zdrasćene być. Po kemšach, kotrež zahaja so w Lipsku w 10 hodź, so zaso domoj nawróća. Zajimče njech so prošu hač do póndžele, 18. apryla, w redakciji Katolskeho Posoła, telefonowe čisło (0 35 91) 55 02 12 abo z mailku na Katolski@Posol.de přizjewja.

Z busom na zjězd katolikow

Štóž chce sej na 100. zjězd katolikow Němskeje do Lipska dojeć, ma k tomu tež z busom dvě móžnosći. Radworske Šmitec wozydłownistwo poskićuje jězbje sobotu, 28. meje, kaž tež njedźelu, 29. meje. Sobotu móža zajimcy flair a tójšto poskitkow zjězda dožiwić, mjez druhim cyrkwinski milu, na kotrejž so biskopstwa a wšelake zwjazki předstaja. Za někotrežkuli zarjadowanje pak je zastupny lisćik zjězda katolikow třěbny. Nadrobnišo je to pod www.katholikentag.de wopisane. Bus wotjědže něhdže we 8.00 hodź. z Łužicy a něhdže w 17.30 hodź. z Lipska. Njedźelu – to je njedźela, na kotrejž su w mnohich serbskich wosadach procesiony z Najswjećišim po wsy – su w Lipsku na Augustusowym naměsće w 10 hodź. zakónčace kemše zjězda katolikow. Předsyda Němskeje biskopskeje konferency, kardinal Reinhard Marx, budže hłowny celebrant. K tomu wotjědže bus něhdže w 6.30 hodź. z Łužicy a něhdže w 13.00 hodź. z Lipska. Zajimcy měli so pola Šmitec wozydłownistwa přizjewić, telefonowe čisło (03 59 35) 28 60.